



Inisiativa Husi Baze Kona-bá Pratika Polisiamentu Komunitaria:

Inisiativa Komandu Distrital Bobonaro, Aileu, Liquisa no Unidade Polisia Marítima

Mahein Nia Hanoin Nú. 05, 15 Novembru 2013



Suporta Husi Povu Amerikanu liu husi USAID no Embaxada Finlandia iha Jakarta



Website: www.fundasaunmahein.org

Kontiudu Sira

Kontiudu sira	1
Sumariu Ezekutivu	2
Introdusaun: Inisiativa husi Baze Kona-bá Pratika Polisiamentu Komunitaria	4
Modelu Polisiamentu Komunitaria iha Distritu Bobonaro no Aileu:	
Konsellu Polisiamentu Komunitaria – KPK	5
Modelu Polisiamentu Komunitaria iha Distritu Liquisa:	
Siguransa Voluntariu – SV	12
Modelu Pratika Polisiamentu Komunitaria iha UPM	19
Sumariu Rekomendasaun	23
Aneksu Sira	24

Sumariu Ezekutivu

Fundasaun Mahein (FM) hala'o tiha ona estudu kazu iha Komandu Distrital Bobonaro, Aileu, Liquisa no Unidade Polisia Maritima. Estudu ne'e kona-bá inisiativa Komandu Distrital sira implementa polisiamentu komunitaria tuir esperiensa ne'ebé sira hetan no pratika ida ne'e la'o tuir natureza siguransa iha distritu ida-idak.

Iha distritu Bobonaro no Aileu Komandu distrital rua ne'e serbisu hamutuk ho parseiru dezenvolvimentu sira, ONG, lider komunitaria no comunidade sira hari'i Konsellu Polisiamentu Komunitaria – KPK. Kompozisaun husi KPK involve polisia, lider komunitaria, joven feto no mane, veteranus, lia na'in sira no comunidade. Nune'e mos pratika ida ne'e hala'o mos iha Distritu Liquisa ho naran Siguransa Voluntaria – SV nia kompozisaun involve polisia, lider komunitaria, joven feto no mane, veteranus, lia na'in sira no comunidade. Inklui inisiativa husi Unidade Polisia Maritima hala'o atividade polisiamentu komunitaria serbisu hamutuk ho peskador sira, fa'an na'in no sosa na'in ikan iha tasi ibun ho aprosimasaun polisiamentu nian.

KPK hanesan modelu siguransa konjunta entre PNTL no comunidade atu bele identifika problema sira ne'ebé akontese iha comunidade nia leet. KPK halo identifikasaun ba situasaun iha suku no aldeia laran hanesan situasaun siguransa, ekonomia, política no dezenvolvimentu jeral sira seluk ne'ebé akontese iha suku refere. Ikus dezeña atividade regular hanesan dezenvolve sistema siguransa ne'ebé orientasaun ba povu maka sai na'in no kria siguransa rasik, prevene krime, hari'i paz no mantein paz no dezeña sistema.

KPK sai alternativu justisa iha comunidade wainhira justisa formal labele asesu to'o ba teritoriu tomak no instituisaun seluk ne'ebé suporta halo mediasaun ba comunidade wainhira hasoru problema. KPK adopta sistema justisa tradisonal ne'ebé eziste ona iha comunidade, ikus comunidade fasil tebes kopera ho PNTL hodi ezejuta hamutuk. Modelu julgamentu tuir pratika justisa tradisonal nian ba kazu ruma, lalaok mediasaun ne'ebé involve familia disputante sira, entau comunidade nia vizaun hare ida ne'e hanesan alternativu husi justisa formal ne'ebé seidauk to'o baze.

Pratika seluk hanaran Siguransa Voluntariu - SV nu'udar modelu pratika polisiamentu komunitaria iha Distritu Liquisa. SV nia funsaun maka fo protesau, fo informasaun no buka maneira hodi hari'i situasaun seguru, paz no hakmatek ne'ebé hala'o husi individu ka pesoal voluntariu hodi kontribui ba siguransa. Membro SV iha suku ema na'in rua husi joven feto ida ho mos joven mane ida ho lider komunitariu seluk ne'ebé involve rasik.

Estabelementu SV mos sai asaun alternativa hodi loke lidun ba partisipasaun comunidade ho ativu ba dezenvolvimentu atu hetan informasaun kona-bá saida deit akontese iha distritu Liquisa. Tanba iha momentu ne'ebé instituisaun Estadu nian ne'ebé fornese informasaun kona-bá dezenvolvimentu la funsiona ho diak. Entaun inisiativa husi PNTL ho lider komunitariu estabelese SV atu loke partisipasaun comunidade nian

iha dezenvolvimentu iha seitor hotu-hotu inklui prevensaun konfliktu, hari'i paz, mantein paz no promove paz.

Iha nivel prevensaun nian realiza asaun preventiva ida ne'ebé efetivu no akumula partisipasaun komunidadade nian iha distritu to'o suku no aldeia, hamosu planu serbisu ida halo estatistika ba problema sira ne'ebé akontese, sorumutu entre membru SV hodi identifika problema, identifika grupu ka individu ne'ebé sai terjetu atu suporta no hamosu solusaun. Rona no rekolla informasaun husi komunidadade no hamosu estratejia prevensaun ida ne'ebé efetivu no orienta ba solusaun.

Inisiativa sira ne'e hanesan forsa komunitaria ida ne'ebé inisia husi Komandu Distrital ho komunidadade maibe seidak hetan atensaun masimu husi Governu sentral ka ministériu relevante. Durante ne'e parseiru dezenvolvimentu ka doador no ONG sira maka suporta no serbisu voluntariu husi komunidadade.

FM hare katak inisiativa sira ne'e pesiza suporta husi Governu, hanesan patrimoni komunidadade nian ne'ebé hahu husi baze, komunidadade sai na'in ba serbisu ne'ebé sira inisia no la gastu osan ne'ebé boot ba prevensaun konfliktu nian hodi hari'i paz no hakmatek iha komunidadade nia leet.

Rekomendasaun

1. Rekomenda ba Ministériu Defeza no Siguransa presiza apoiu politika no orsamentu ba atividade polisiamentu komunitaria ne'ebé ho inisiativa hari KPK no Siguransa Vountaria iha distritu sira no husu apoiu inisiativa sira ne'e habelar Komandu Distrital seluk.
2. Rekomenda ba Parlamentu Nasional Komisaun B ne'ebé trata ba asuntu defeza, siguransa no negosiu estranjeiru kontinua halo fiskalizaun ba atividade polisiamentu nian iha nivel distrital nian hodi hare progresu serbisu ne'ebé inisia husi Komandu Distrital sira no husu ministériu relevante fortifika saida maka inisia husi polisia sira.
3. Rekomenda ba Sekretaria Estadu Siguransa (SES) estabese koordenasaun serbisu entre Komandu PNTL liu husi Departamentu Polisiamentu Komunitaria ho Dirasaun Nasional Prevensaun Konfliktu Komunitaria (DNPCK) ho integradu ba prevensaun konfliktu nian, maske durante ne'e iha ona Rede Nasional Prevensaun Konfliktu (RNPK) maibe ida-ida la'o keta-ketak.
4. Rekomenda ba Komandu PNTL kontinua serbisu hamutuk ho organizasaun soiedade sivil no parseiru dezenvolvimentu sira atu nune'e bele habelar liu tan atividade polisiamentu komunitaria iha Komandu Distrital sira iha teritoriu tomak.

Inisiativa husi Baze Kona-bá Pratika

Polisiamentu Komunitaria:

Inisiativa Komandu Distrital Bobonaro, Aileu, Liquisa no Unidade Polisia Marítima

Introdusaun

Polisiamentu komunitaria nu'udar karakteristika Polisia Nasional Timor-Leste (PNTL) ne'ebé difine tiha ona iha Lei Organika PNTL nian iha Dekretu Lei Nú. 9/2009 loron 18 fulan Feveiriu. Iha prinsipiu jeral PNTL nian natureza no misaun defini estratejia no filozofia polisiamentu nian, PNTL iha karakterístika polisia komunitária.¹

Artigu 18 Lei Organika PNTL nian defini Departamentu Polisiamentu Komunitariu maka unidade ida iha Komandu Nasional nia laran ne'ebé iha misaun espesifika hanesan tuir mai: a) Tuir kolaborassun ho Sentru Formasaun Polisia nian, defini nesesidade no programa instrusaun ba serbisu espesializadu polisiamentu komunitáriu nian; b) Elabora Estudu, pareser, programa no atividade sira ne'ebé Komandu Distrital sira atu dezenvolve hamutuk ho populasaun; c) Halo publisidade kona-bá kna'ar no misaun PNTL nian iha comunidade nia leet; d) Fó apoiu ba Komandu Distrital hodi estabelese relasaun ho estrutura sira iha comunidade nia laran; e) Hala'o tarefa seluk ne'ebé monu iha ámbitu misaun nian, nia laran.²

Fundasaun Mahein (FM) hala'o tiha ona estudu kazu iha Komandu Distrital Bobonaro, Aileu, Liquisa no Unidade Polisia Maritima. Estudu ne'e kona-bá inisiativa Komandu Distrital sira implementa polisiamentu komunitaria tuir esperiensa ne'ebé sira hetan no pratika ida ne'e la'o tuir natureza siguransa iha distritu ida-idak.

Iha distritu Bobonaro no Aileu Komandu distrital rua ne'e serbisu hamutuk ho parseiru dezenvolvimentu sira, ONG, lider komunitaria no comunidade sira hari'i Konsellu Polisiamentu Komunitaria – KPK. Kompozisaun husi KPK involve polisia, lider komunitaria, joven feto no mane, veteranus, lia na'in sira no comunidade. Nune'e mos pratika ida ne'e hala'o mos iha Distritu Liquisa ho naran Siguransa Voluntaria – SV nia kompozisaun involve polisia, lider komunitaria, joven feto no mane, veteranus, lia na'in sira no comunidade. Inklui inisiativa husi Unidade Polisia Maritima hala'o atividade polisiamentu komunitaria serbisu hamutuk ho peskador sira, fa'an na'in no sosa na'in ikan iha tasi ibun ho aprosimasaun polisiamentu nian.

Objetivu husi atividade hirak ne'e atu kria ambiente paz no hakmatek iha comunidade nia leet. Nu'udar inisiativa husi baze hanesan forsa sosial ida ba prevensaun konfliktu nian maibe sei dook husi Governu sentral nian atensaun. Durante ne'e inisiativa hirak ne'e hetan suporta husi doador no ONG sira inklui serbisu voluntariu husi comunidade sira.

¹ Dekretu Lei Nú. 9/2009 loron 18 fulan Feveiriu. Lei Organika PNTL nian. Artigu 1) alinea 2).

² Dekretu Lei Nú. 9/2009 loron 18 fulan Feveiriu. Lei Organika PNTL nian. Artigu 18.

Modelu Polisiamentu Komunitaria iha Distritu Bobonaro no Aileu:

Konsellu Polisiamentu Komunitaria – KPK

“KPK sai alternativa justisa iha distritu iha momentu ne’ebé povu nia asesu ba justisa formal dook tebes, tan ne’e inisiativa PNTL ho comunidade husi baze sai úniku patrimoniú atu mobiliza hodi kria justisa ho hakmatek ba povu iha nia knua rasik no sai na’in iha nia knua, ne’e ezemplu diak ba ukun na’in nasaun nian no husu ba sira atu suporta polítika ho moral”

(Xefi Suku Laomea, Lucio Americo, 29 Marsu 2012).

Introdusaun

Iha estudu kazu ida ne’e fokus ba pratika modelu Polisia Komunitariu husi tipu oin-oin ne’ebé pesoal polisia aprende husi estudu komparativu iha nasaun seluk. Relatoriu estudu kazu ida ne’e hetan intervista husi pesoal polisia ho lider komunitariu iha distritu Bobonaro ho Aileu. Aileu hetan intervista husi ema na’in 6, PNTL na’in tolu no lider komunitariu ema na’in tolu. Intervista husi Bobonaro - Maliana ema na’in 12, PNTL ema na’in 4, no lider komunitariu na’in 8.

Razaun fokus estudu kazu ida ne’e ba distritu Bobonaro no Aileu tanba iha pratika Polisiamentu Komunitariu ne’ebé involve grupu oin-oin iha comunidade nia leet. Grupú oin-oin mai husi grupu veteranu, juventude, lia na’in, grupu fetu, arte marsial no seluk-seluk tan. Tanba involve comunidade, PNTL tau naran ba Polisiamentu Komunitariu ne’ebé konjunta ho comunidade ne’e ho naran Konsellu Polisiamentu Komunitariu (KPK). KPK nia funsaun atu dezenvolve modellu siguransa konjunta entre PNTL no comunidade atu bele identifika problema sira ne’ebé akontense iha comunidade nia leet no buka solusaun lalais.

Modelu KPK ne’e dezenvolve husi eis Komadante Distritu Bobonaro Superintendente Xefe João Belo. Komadante Belo antes ne’e halo vizita ba rai liur hodi aprende modelu Polisiamentu Komunitariu oin-oin husi nasaun seluk. Ho referensia nasaun seluk ne’e tulun nia ikus mai dezeña rasik modelu Polisiamentu Komunitariu ida ne’ebé bele aplika tuir natureza siguransa iha Timor-Leste. Iha 2010 modelu Konsellu Polisiamentu Komunitariu hahu realiza iha suku 10 ne’ebé lokaliza iha distritu Bobonaro.

Nune’e mos hatutan husi Komadante Distritu Aileu iha suku 11 iha distritu Aileu. Dahuluk husi pratika ne’e Komandu Distritu Bobonaro ho Aileu kria ekipa Polisia komunitariu ho naran “Ofisial Ligasaun PNTL (OL-PNTL)” ba kada suku. Razaun forte ne’ebé iha no pratika KPK iha Bobonaro no Aileu tanba iha koordinasaun Komandu PNTL ho lider komunitariu sira liu husi aprosimasaun ne’ebé komandu distritu rua ne’e halo.

Bazeia ba esperensia funu tinan 24 nia laran ho Indonezia ne’e kria Konsellu Resistensia no involve comunidade barak iha tempu ne’eba sai konseitu ba lider komunitariu sira atu bele involve ativu ba aprosimasaun husi PNTL atu hari’i no pratika modelu Konsellu Polisiamentu Komunitariu. Kompozisaun husi Konsellu Polisia Komunitariu ne’e relembra

fali esperiensiã serbisu hamutuk durante tempu rezistensia atu buka dalam oinsa organiza an husi grupu komunitariu ne'e hodi fo tulun ba kontribuisaun siguransa iha komunidadade nia leet, ne'e sorin ida. Iha sorin seluk involvmentu lider komunitariu ne'e mos atu fasilita Konsellu Suku ne'ebé dezenvolve husi Governu lokal kona-bá dezenvolvmentu rural. Tanba membru KPK ne'ebé reprezenta husi komunidadade ne'e rasik husi lider potensial sira ne'ebé iha influensia maka'as ba komunidadade iha kada suku.

Kriasaun KPK ne'e hanesan inisiativu Komandu PNTL sira, tuir sira nia esperensia siguransa iha kada distritu, nune'e mos haforsa organizasaun komunitariu iha suku atu involve pro-ativu ba indentifikasaun problema no buka solusaun imidiatu ba kada konfliktu ne'ebé mosu no lapresiza hein Governu nia intervensaun husi kapital distritu ka nasaun nian husi Dili.

KPK Sai Alternativa Justisa

Polisia buka meus oin-oin atu halo prevensaun konfliktu hodi involve komunidadade hanesan asaun alternativu ida atu kria justisa ba komunidadade iha distritu wainhira justisa formal labele asesu to'o ba teritoriu tomak. Distritu Bobonaro-Aileu seidauk iha Tribunal ho Prokurador distritu no mos institusaun seluk ne'ebé suporta halo mediasaun ba komunidadade wainhira hasoru problema.

KPK la'os halo mediasaun deit, maibe mos sai fontes informasaun dezenvolvmentu nian ba komunidadade. Tanba membru KPK iha ligasaun ba rede Governu nian iha distritu no mos iha Governu sentral. Ezemplu, membru KPK ne'ebé mos hanesan PNTL dala barak liu simu orientasaun husi sira nia komandu kona-bá vizita Ministru ka Sekretariu Estadu balun. Iha momentu ne'eba tulun sira hetan informasaun dahuluk. Nune'e mos membru konsellu suku ho lider komunitariu sira.

Porsentu 80 membru PNTL halo kna'ar iha distritu maibe fasilidade hanesan viaturas ka sistema komunikasaun 80 porsentu fasilidade ba suporta PNTL ne'e hela iha kapital Dili. Rezulta husi distribusan fasilidade ladun diak entaun halo kiak PNTL nia fornese siguransa no harii lei ho ordem dala barak menus. Atu prenxe lista husi fornese siguransa no bolu partisipasaun komunidadade suporta PNTL lapersiza osan barak no fasilidade sira ne'ebé PNTL persiza, KPK nia papel halo fasil liu loke lidun ba komunidadade – PNTL serbisu hamutuk ho diak no lalais kria situasaun diak maske laiha suporta fasilidade barak.³

Ho razaun sira temi iha leten Komandu PNTL distritus Bobonaro no Aileu nia inisiativa hamosu KPK nu'udar orgaun komunitariu atu halo asaun prevensaun husi estuda, monitorizasaun no mediasaun to'o fo solusaun tradisional lalais, menus gastu ba tempu, nune'e mos lagastu material ka presiza osan barak. Diak liu husi KPK ne'e maka grupu komunidadade sira iha distritu involve dereita halo identifika problema no hamutuk halo asaun preventiva ba problema sira ne'ebé sira identifika no fo solusaun tuir lalaok kultural ne'ebé iha.

³ Belo, João. (2013). Eis Komadante Distritu Bobonaro. Entrevista Pesoal.

Iha parte seluk tanba asaun KPK ne'e kontinua la'o tuir justisa tradisional ne'ebé eziste ona iha comunidade, ikus mai fasil ba comunidade koopera ho PNTL hodi ezejuta hamutuk. Tanba KPK adopta sistema justisa tradisional wainhira halo julgamentu ba kazu ruma, lalaok mediasaun ne'ebé involve familia disputante sira, entao comunidade nia vizaun hare ida ne'e hanesan alternativu husi justisa formal ne'ebé seidaok to'o baze, ne'e seluk ida, iha seluk sorin sistema KPK wainhira halo julgamentu kontinua kaer familia unidade no lahafahe familia tanba problema saida deit sempre rezolve tuir sistema familia ne'ebé iha distritu Bobonaro no Aileu.

Deskrisaun Atividade KPK

Hahu tinan 2011 nian Komandu Distrital PNTL hahu kria ekipa PNTL ne'ebé atu ba halo aprosimasaun ho comunidade iha kada suku. Depois iha koordenasau diak ho konsellu suku no organizesaun komunitariu, Komandu Distritu Bobonaro delega pesoal PNTL ne'ebé serbisu hamutuk ho comunidade maka hanaran "Ofisial Ligasaun PNTL" (OL-PNTL). OL-PNTL la'os sai koordinator maibe fasilita deit grupu comunidade sira ne'ebé sai membru ba KPK, no kria enkontru ho kada grupu sira ne'ebé eziste iha comunidade nia leet. Enkontru KPK atu halo identifikaun ruma ba situasaun iha suku ka aldeia laran no oinsa bele kria lalais solusaun ba problema sira ne'ebé akontese.

OL-PNTL ne'ebé delega ba suku sempre halo vizita ba suku ne'ebé sira sai membru KPK atu halo enkontru ho membru KPK sira seluk ne'ebé mai husi comunidade. Durante enkontru sira aktualiza ba malu kona-bá situasaun siguransa, ekonomia, politika no dezenvolvimentu jeral sira seluk ne'ebé akontese iha suku refere. Depois aktualiza hotu tiha, membru KPK halo identifikaun kona-bá potencia problema. Identifikaun problema tuir nia tipu:

- a. Problema polítiku
- b. Problema ekonomia
- c. Problema disputa rai
- d. Problema juventude
- e. Problema fetos-san ho uma-mane
- f. Problema violensia domestika
- g. Krime organizadu ho krime seluk-seluk tan
- h. Problema siguransa

Identifikaun ne'e tau tuir nia tipu atu nune'e fasil ba KPK atu kria soluasaun. Karik tipu problema balun ne'ebé membru KPK laiha kapasidade atu rezolve, maka sei halo rekursu ba Governu tuir autoridade lokal iha Governu lokal nian.

Atu kontinua maintein situasaun kalma no hakmatek iha suku sira, membru OL-PNTL hamutuk ho membru KPK seluk mos halo aprosimasaun ho Institusaun Relijiaun ho ONG sira ne'ebé halo kna'ar iha sira nia area. Dala ruma ONG sira ne'ebé iha informasaun kona-bá HIV/Sida ho droga nian, membru KPK hatutan informasaun ba juventude sira, nune'e mos dala ruma loke filmajem kona-bá istoria Timor-Leste nu'udar animasaun ba comunidade.

Atividade seluk maka membru OL-PNTL mos atualiza ba membru KPK seluk atu nune'e bele fo tutan ba comunidade liu husi atividade komunitariu hanesan festa kazamentu, lia mate ka moris. Tanba iha eventu sira hanesan temi iha leten ne'e konsentra comunidade sira iha fatin ida fasil ba KPK atu halo esplikaun, tanba ho meius sira hanesan ne'e KPK lapresiza tenke ba tama sai uma atu fo informasaun. Ezemplu iha Suku Balibo Sub-distritu Balibo, KPK fo informasaun kona-bá droga ne'ebé husi Dili no hakur fronteira ba Indonezia fo sai iha festa ida. Iha momentu ne'eba husi ibun ba ibu ema hotu iha festa ne'e hatene lalais kona-bá akontesementu droga husi Timor-Leste ba Indonezia.

KPK husi Bobonaro ba Aileu

Distritu Aileu sai ezemplu faktual katak pratika Polisia Komunitariu modellu KPK tutan hosi pratika modellu KPK husi distritu Bobonaro. Dezeña atividade KPK iha Bobonaro la hanesan ho Aileu maibe ezemplu jeral ne'ebé iha Bobonaro sai mata dalan pratika KPK iha Aileu. KPK iha Aileu mos aplika iha suku 10 hanesan pratika pilotu no kada suku iha OL-PNTL hamutuk ho membru KPK seluk atu halo knáar ba area rua.

- a. Hamenus krime
- b. Harii no haforsa relasaun diak PNTL – Komunitade hamutuk mantein siguransa hakmatek ba suku sira.

Iha biban boot modelu KPK ne'e bele aplika iha distritu hotu-hotu iha Timor-Leste. Tanba Polisiamentu Komunitariu modellu KPK ne'e fasil atu aplika tuir natureza siguransa kada distritu.

Modellu KPK husi distritu Bobonaro ne'ebé aplika iha distritu Aileu sai ezemplu diak ba Governu atu haree oinsa maka fo suporta atu bele aplika iha Timor-Leste tomak. Iha biban boot ne'e bele aplika iha Timor laran tomak tanba modelu KPK ne'e kria rasik husi inisiativa comunidade ho PNTL. Inisiativa husi comunidade no PNTL husi baze nu'udar forsa boot no lejtimu liu ne'ebé povu rasik kria hanesan sai polítika na'in ba modelu Polisiamentu komunitariu ne'ebé sira rasik hakarak dezenvolve no labele hein deit husi Governu. Inisiativa ne'e sai sinal diak husi partisipasaun ativu husi povu ba prevensaun konflitu iha comunidade nia leet. Sinal diak husi baze ne'e provoka lider nasaun atu fo suporta polítika ba modelu KPK ne'ebé aplika dadaun ona, Governu presiza investe ba inisiativa diak husi comunidade ne'e.

Implementasaun KPK iha Aileu ho Bobonaro kontinua la'o tuir natureza siguransa ida-idak nian, maibe komunikasaun entre komandu PNTL distritu Bobonaro ho Aileu ativu hodi troka esperiensa no estretejia. Iha nivel nasional, komandu distritu Bobonaro no Aileu fo informasaun ba Komandu Jeral kona-bá pratika modelu KPK ne'ebé aplika iha sira nia distritu. Komandu Jeral serbisu hamutuk ho ONG *The Asia Foundation* no parseiru internasional seluk atu hetan suporta fundus, tanba durante ne'e seidauk iha fundus espesifiku ba atividade polisiamentu komunitariu.

Iha lakuna tolu ne'ebé halo Polisia Komunitariu la'o ho diak maka tuir mai ne'e:

- a. Lei Organiku PNTL art. 18 Lei Nú. 9/2009 laron 18 Febreiru ne'ebé fo biban ba komandu distritu PNTL tuir sira nia kompetensia iha distritu.
- b. Sidauk iha kuiñesementu diak husi komandu PNTL distritu sira.
- c. Ministériu interligasaun sira seidauk hatur polítika prevensaun ho diak.

Ho razaun sira ne'e, Komandu PNTL distritu sira ba tuir estudu komparativu iha rai liur, sira iha inisiativa rasik atu dezenvolve modelu Polisiamentu Komunitariu. KPK modelu ida ne'ebé serve no aplika ona no bele responde natureza siguransa iha distritu Bobonaro no Aileu. Tanba suporta husi inisiativa ne'ebé mai husi comunidade Bobonaro no Aileu ba pratika medelu KPK ne'e hatudu ba lider nasaun ne'e nia katak, atu prevene konfliktu lapresiza hein orientasaun husi nasional.

Atividade KPK

Atividade sira ne'ebé aplika iha distritu Bobonaro no Aileu ne'e dezeña husi serbisu conjunta entre PNTL no comunidade tuir natureza siguransa kada areas, maibe pontu jeral maka KPK nia meta dahuluk maka bele involve grupu comunidade iha distritu rua ne'e ho atividade dahuluk no regularmente akontese maka:

- a. Dezenvolve sistema siguransa ne'ebé orientasaun ba povu maka sai na'in rasik no kria siguransa rasik.
- b. Prevene krime
- c. Hari'i paz no mantein paz
- d. Dezeña sistema

OL-PNTL ho membru KPK no comunidade sai pro-ativu halo monitorizasaun ba lalaok siguransa iha comunidade. Dahuluk husi monitorizasaun halo vizita ba suku, sorumutu ho comunidade sira iha aldeia laran. Durante sorumutu ho comunidade esplika kona-bá funsaun KPK no oinsa maka comunidade bele involve rasik iha atividade sira ne'ebé sai programa KPK nian. Alen de ida ne'e, membru KPK mos fo número telefone ba comunidade halo introdusaun membru KPK sira ba comunidade iha suku ka aldeia. Nune'e mos halo identifikaun potencia problema no dezeña solusaun preventiva.

Iha Bobonaro, problema akontese barak kona-bá fronteira rai/natar ka to'os nia, violensia domestika, grupu arte marsiais. Ezemplu problema fronteira natar ka to'os, KPK nia papel maka bolu disputante sira ne'ebé involve, sasin na'in sira iha area refere. Wainhira hetan ona prezensa husi hotu-hotu, KPK tetu bazeia ba faktu sira ka ligasaun familia no relasaun kultural iha area refere, no ligasaun ba istoria rai nian fronteira husi katuas sira. Depois KPK rona hotu tiha sira hotu, KPK husu atu iha meius ruma bele fo solusaun. Meius ba solusaun, ezemplu, fronteira muda ba fatin uluk no nafatin nune'e, ka muda tuir istoria rai nia tuir katuas sira nia hatene ne'ebé barak liu, sorin ida. Iha sorin seluk, violensia domestika KPK sempre halo identifikaun no no wainhira mosu problema KPK bolu no halo esplikasaun oinsa bele rezolve tuir familia nia. Dala barak liu ida ne'e KPK involve inan-aman no lia na'in sira atu nune'e bele hamosu solusaun ne'e diak.

Ezemplu, problema sira ne'ebé temi iha leten, kuandu KPK laiha biban atu fo solusaun tanba problema seriu no kompleksu, entau KPK halo rekursu ba Estadu liu husi membru KPK hanesan OL-PNTL atu bele involve PNTL Investigasaun Kriminal ikus mai lori ba Ministériu Públiku. Tan ne'e komidade sira iha suku no membru KPK iha komidade hamutuk ho autoridade Governu nian iha sub-distritu sira hakruk ba lalaok sira ne'e hanesan sistema ida maka regula sira nia moris wainhira iha problema no hamosu solusaun ba problema.

- Prevene Krime

Patrullamentu membru KPK husi OL-PNTL ho komidade halo avaliasaun ho rezultadu monitorizasaun sira ne'ebé membru KPK informa, no iha urjenti ruma kona-bá isu balun, sira halo surumutu no tenke foti medidas tun kedas ba fatin refere halo komfirmasaun no oinsa maka KPK bele tulun rezolve problema. Nune'e KPK mos dala ruma tun ba komidade kria divertimentu hanesan loke filme, no jogu amijade.

Iha Bobonaro KPK sempre buka tur hamutuk ho lider arte marsial sira. Atu husu oinsa kona-bá sira nia atividade no sempre komvida sira involve iha atividade, no aponta sira sai membru komisaun organizadora ba eventu ruma ne'ebé akontese iha area refere. Iha Aileu KPK involve membru arte marsial sai mos membru KPK no sai liagasaun diak ba sira nia grupu, tan ne'e komfrontasaun ladun akontese wainhira KPK halo nia kna'ar iha 2011. Iha biban seluk ne'e maka interesante membru KPK halo identifikasaun husi atividade ministerial sira ne'e tun ba baze. Membru KPK aproveita tun hamutuk no fasilita membru ekipa ministerial nian. Iha Aileu membru KPK la'o hamutuk ho ekipa sosializasaun lei violensia domestika husi Sekretaria Estadu Promosaun Igulidade (SEPI) halo kampaña kona-bá lei violensia domestika katak sai krime públiku.

- Harii Paz no Mantein Paz

Kria atividade sira iha komidade nia laran orienta ba komidade nia partisipasaun no organiza rasik husi komidade. Inisiativa komidade kria atividade rasik husi serbisu hamutuk halo sira kuiñese malu diak.

Kuiñese malu diak entre grupu komidade iha suku ka distritu sai riku soin ba kria paz no komprensaun entre sira hodi kria situasaun hakmatek iha sira nia suku ka distritu. Tanba ne'e maka membru KPK husi OL-PNTL no OLK-PNTL sai fasilitador importante.

Konkluzau

Modelu Polisiamentu Komunitariu, Konsellu Polisiamentu Komunitariu - KPK ne'ebé inisia husi Komandu PNTL distritu Bobonaro no Aileu hanesan asaun partisipativu konjunta husi komidade ho PNTL atu hametin paz no kria justisa ba komidade iha biban ne'ebé asesu ba justisa formal dok los husi komidade. Seluk husi ida ne'e mos ajuda PNTL halo nia polisiamentu komunitariu ne'ebé laiha suporta orsamentu masimu husi

Governu. Tan ne'e KPK sai alternativu atu bolu hamutuk grupu komidade sira sai parseiru ho PNTL hodi kria paz no justisa.

Alokasaun orsamentu ba Departamentu Polisia Komunitariu menus, nune'e mos pesoal PNTL ho fasilidade hanesan kareta ho komunikasaun iha distritu menus, ikus mai fornese siguransa seguru ho justisa iha komunitariu ladun efektivu ho efikas. Tanba ne'e KPK nia prezensa sai fatin ba grupu potensial sira iha komidade atu involve an rasik no sai na'in ba sigurasan no mos justisa ne'ebé sira kria rasik no ikus mai komidade fo konfiansa tanba sira nia involmentu direta, abertu no lagastu osan, lalais no kontinua hametin relasaun familia ne'ebé forte no saudavel iha suku ka aldeia, tan ne'e maka persiza habelar KPK ba iha distritu tomak no husu Governu nia suporta polítika diak ba obra ne'ebé povu kria rasik husi baze.

La'os tenke iha osan ho fasilidade kompletu maka tenke serbi nasaun ho povu. Ida ne'e sai moto ba komandu PNTL distritu Joao Belo. Hatudu tiha ona iha asaun KPK katak ho iniciativa diak ho partisipasaun ativu husi komidade sai riku soin boot atu kria siguransa no prevensaun ba konflitu sira iha komidade no kria modelu komidade ida ne'ebé pro ativu ba dezenvolvementu nasional tenke mai husi baze.

Husi Maliana nia hahu, KPK loke tan liras iha Aileu ne'e hatudu katak iniciativa husi PNTL komandu distritu sira loke lidun ba partisipasaun povu ba dezenvolvementu husi baze maka'as liu kona-bá hadia sistema siguransa nian.

Espetativa komidade nian ba futuru katak sistema siguransa partisipativu ne'ebé forma husi KPK ne'e akumula povu hotu nia interese. Ne'e katak sira sai na'in ba sigurasan no halo prevensaun ba konflitu importante liu, duke halo atuasaun ba konflitu.

Modelu Polisiamentu Komunitaria iha Distritu Liquisa Siguransa Voluntariu - SV

Introdusaun

Estudu kazu ida ne'e fokus ba Pratika Polisiamentu Komunitariu iha Distritu Liquisa. Fokus estudu kazu ne'e intervista ho Komadande Distritu Liquisa, Komandante PNTL distritu ne'ebé úniku feto iha PNTL laran. Iha biban ida ne'e intervista mos Komandante Polisia Komunitariu distritu Liquisa nian hamutuk na'in 3, kondutor kareta na'in 2, joven na'in 2, no lider komunitariu na'in 4 no intervista ho ONG JSMP ne'ebé halo knaar iha distritu Liquisa ne'ebé halo sosializasaun ba sistema judicial nian, no mos be lei violensia domestika.

Pratika Polisiamentu komunitariu ne'e adopta husi nasaun seluk mai Timor-Leste depois komandu PNTL distritu balu ba tuir estudu komparativu iha liur depois fila mai Timor-Leste. Pesoal PNTL sira ne'e idak-idak dezeña Polisiamentu Komunitariu tuir natureza situasaun siguransa iha distritu. Iha Bobonaro - Aileu pratika Konsellu Polisiamentu Komunitariu (KPK), Polisiamentu Komunitariu iha distritu Liquisa bolu Siguransa Voluntariu (SV).

Hahu tinan 2009 iha distritu Liquisa pratika Polisiamentu Komunitariu Siguransa Voluntariu. SV nia funsaun maka fo protesasaun, fo informasaun no buka maneira hodi hari'i situasaun seguru, paz no hakmatek ne'ebé hala'o husi individu ka pesoal voluntariu hodi kontribui ba siguransa. Membru SV iha suku ema na'in rua husi joven feto ida ho mos joven mane ida ho lider komunitariu seluk ne'ebé involve rasik.

Tanba to'o agora sidauk iha treinamentu espesifiku ba membru SV, maibe komandu PNTL distritu Liquisa fo deit treinamentu baziku ba SV kona-bá monitorizasaun ba siguransa nian, kuandu akontense problema, sira uza sistema "*Miss Call*" ba PNTL distritu Liquisa depois PNTL telefone fila ba sira hodi hetan esplikaun klaru no atusaun PNTL lalais ba kedas fatin akontesementu halo intervensaun dialogu ka tipu preventiva ruma.

Sidauk hetan treinamentu espesiku husi institusaun kompetenti, maibe inisiativa membru SV ho PNTL distritu hamutuk ho komunidadade Liquisa hahu tiha ona halo serbisu durante eleisaun Presidensial ho Parlamentar iha tinan 2012. Tuir lei eleitoral katak Polisia Nasional Timor-Leste nia lokalizasaun hetan distansia husi sentru votasaun metru 25, entau Polisia distrital uza SV atua situasaun iha sentru votasaun sira hotu ne'ebé lokaliza iha distritu ne'eba. Durante iha tempu ne'eba SV hetan informasaun barak, depois pasa ba PNTL no hodi halo atendentu lalais.

Serbisu PNTL-SV ho komunidadade iha distritu Liquisa to'o agora seidaun iha suporta husi Governu kona-bá treinamentu ruma, ne'e sorin ida. Sorin seluk, alen de la iha suporta nune'e mos seidaun iha rekuiñesementu husi lider polítiku sira atu suporta SV ne'e

konsege halo nia knáar prevensaun konfliktu ne'ebé parseiria diak ho Komandu PNTL distritu Liquisa.

Postura Siguransa Voluntariu

Membru Siguransa Voluntariu mai husi grupu komunidadade oin-oin hanesan artemarsial, bairu sira, representante grupu fetu, joven fetu ho mane, membru konsellu suku, nune'e mos povu bain-bain ne'ebé iha suku ka aldeia laran. Membru siguransa voluntariu nian tuir kada sub-distritu hanesan Liquisa Vila, Bazartete ho Maubara total 242 voluntariu ne'ebé lokaliza iha distritu Liquisa maka:

- a. Liquisa Vila : Voluntariu 61
- b. Bazartete : Voluntariu 77
- c. Maubara : Voluntariu 104

Nivel Estratejia

Estabelesementu SV mos sai asaun alternativa hodi loke lidun ba partisipasaun komunidadade ho ativu ba dezenvolvimento atu hetan informasaun kona-bá saida deit akontese iha distritu Liquisa. Tanba iha momentu ne'ebé institusaun Estadu nian ne'ebé fornese informasaun kona-bá dezenvolvimento la funsiona ho diak. Entaun inisiativa husi PNTL ho lider komunitariu estabelese SV atu loke partisipasaun komunidadade nian iha dezenvolvimento iha seitor hotu-hotu inklui prevensaun konfliktu, hari'i paz, mantein paz no promove paz.

Nune'e mos partisipasaun komuidade iha SV hanesan estratejia atu kria sosiedade ida ne'ebé pro-ativu ba prevensaun no hamoris dialogu no fo informasaun kona-bá problema sia ne'ebé akontese iha sub-distritu, suku ka aldeia laran, no hamosu lalais solusaun, no identifika problema no halo rekursu ba problema graves sira ba Governu distritu ka nasional kuandu PNTL ho SV labele rezolve.

Nivel Prevensaun

Atu realiza asaun preventiva ida ne'ebé efetivu no akumulá partisipasaun povu hotu iha distritu Liquisa, fokal point ne'ebé ho naran "Ativa Oficial Ligasaun Suku (AOLS)" hamosu planu serbisu ida ne'ebé tuir mai:

- a. Halo estatistika ba problema sira ne'ebé akontese
- b. Sorumutu entre membru SV hodi identifika problema
- c. Identifika grupu ka individu sai tarjetu atu suporta hamosu solusaun.
- d. Rona no rekoilla tan informasaun husi komunidadade
- e. Hamosu estratejia prevensaun ida ne'ebé efetivu no orienta ba solusaun.

Iha kada suku ka aldeia iha membru SV. Kada loro-loron membru iha sub-distitu, liu husi sistema "Miss Call" ba número telefone "77622648".⁴ Depois simu *miss call*, AOLS halo

⁴ Número kontaktu ne'e 77622648 nu'udar número sentral iha polisia, waihira iha konfliktu ruma, asidenti no dezastre naturais iha dalan Siguransa Voluntariu – SV sira mis call ba número ne'e, atu nune'e polisia bele halo intervensaun lalais.

kedas ligasaun ba númeru telefone ne'ebé tama iha sistema *miss call* nian hodi halo klarifikasaun.

AOLS sira halo identifikasaun ba problema ne'ebé hato'o husi sistema *miss call*. AOLS ho membru SV hamutuk kria programa voluntariu nian hodi responde lalais problema ne'e tanbasa mak situasaun siguransa lahakmatek, iha ka involvmentu grupu komunidadade ka grupu polítiku sira, ka individu maka sai motivador ba akontesementu hirak ne'ebé atu iha no iha dadaun.

Saida Maka Halo Ona?

Maske laiha suporta política no orsamentu husi Governu sentral, maibe mobilizasaun komunitariu hare dadaun ona iha baze. Implementasaun programa serbisu hahu husi fahe informasaun ba komunidadade husi nivel distritu hahu iha 2010. Iha tinan 2010 identifika situasaun siguransa iha distritu Liquisa ne'ebé ass liu mak violencia domestika iha uma kain sira. Programa sosializasaun husi nivel distritu involve lider komunitariu ho Governu lokal, nune'e sosializasaun kontinua to'o iha suku ho aldeia to'o remata tinan 2011 nia rohan.

Depois sosializasaun iha tinan 2011 nia klaran hahu foti dadus ho SV. Iha momentu ida ne'e SV hahu halo monitorizasaun no implementa programa *miss call*. Durante ne'e programa *miss call* sai hanesan aprende ho hakna'ar ka *learning by doing*. Aprende ho hakna'ar fasilita SV koko aplika iha eleisaun prezidensial husi kampaña, *quick count* to'o rezultadu eleisaun no mai to'o formasaun Governu iha 2012. SV fasilita PNTL implementa asaun preventiva, husi halo aprosimasaun ba membru STAE ho CNE iha sentru votasaun sira ne'ebé lokaliza iha distritu Liquisa. Ho aprosimasaun SV fasil asesu movimentu iha sentru votasaun. Depois nune'e aktualiza ba PNTL hodi halo asaun nesesariu ruma lalais no preventiva.

Knáar SV-AOLS hanorin komunidadade responsabiliza sira nia siguransa rasik, ne'e sorin ida. Iha sorin seluk, implementa iha eventu eleisaun jeral 2012 ne'e hanesan faktu ne'ebé ema hotu labele nega katak SV ne'e adaptasaun ba eventu saida deit no fleksibilidade maka'as ba tipu polisiamentu komunitariu no komunidadade nia polisiamentu.

Sasidik Implementasaun SV iha Liquisa

Kriasaun SV estabese husi Komandu PNTL distritu Liquisa to'o agora seidak iha suporta ruma, husi suporta treinamentu no mos suporta fundus ruma. La'os ne'e deit, maibe legalizasaun ba SV ne'e mos kontinua sai perguntas ba públiku. Tanba baze legal ba organizasaun SV nian kontinua la iha rekuñesementu husi lejislasaun Governu sentral nian nune'e mos husi Governu lokal iha distritu Liquisa.

Membru SV ne'ebé iha kapasidade baziku kona-bá mediasaun la iha liu no bazeia deit ba orientasaun AOLS ho motivasaun nasionalismu. Rezultadu husi ida ne'e tanba seidak iha treinamentu husi peritu sira mediasaun ba konflitu no oinsa maka bele estuda siklu konflitu hodi kria balansu ida ne'ebé neutral. Nune'e mos apoiu ekipamentu hanesan uniforme ka fardamentu, kartaun identidade katak sira ne'e membru SV mos seidak iha. Hetok aat liu tan kuandu tempu udan. Por ezemplu, wainhira sira identifika problema

ruma atu halo deit *miss call* mos susar pulsa la iha, no ikus mai atedementu tarde no rezulta konfrontasaun ruma.

SV sai ona modelu Pratika Polisiamentu Komunitariu iha distritu Liquisa sai ona mata dalan diak ba tipu prevensaun konfliktu. SV hahu hatudu ona nia rezultadu iha eleisaun 2012. Susesu kiik no lejitimasaun komunidadade ba kna'ar AOLS ho SV kontinua hatudu, maibe aat liu tan to'o Orsamentu Jeral Estadu iha tinan 2013 mos la iha alokasaun orsamentu ba rubrika Polisiamentu Komunitariu. Ida ne'e kontinua sai ignoransia husi lider politika no governante sira iha Governu sentral to'o lokal atu la bele fo apoiu ba inisiativa ne'ebé iha ona.

Asuntu seluk ne'ebé maka akontese siguransa ba pesoal SV mos ladun klaru, tanba la iha garantia no subsidiu, maibe hanesan los voluntariu, maibe risku boot ba sira nia familia ho siguransa mos kontinua sai kestaun.

Husi Sasidik ba Susesu

Biban ba partisipasaun husi 63,452 total populasaun iha distritu Liquisa kontinua nakloke boot. Susesu seluk ne'e bele hare husi estudu kazu ne'e katak la iha suporta orsamentu, komunidadade kontinua parseiru ho PNTL. Lejislasaun no suporta politika seluk la'os sai kestaun atu mobiliza povu involve ba programa prevensaun ba konfliktu. Maibe inisiativu no esperansa boot ne'ebé inisia husi povu distritu Liquisa sai kapital boot ba partisipasaun ativu.

Kna'ar membru SV fahe ba malu atu hatene se maka bele rezolve problema ida ne'e ka ida ne'eba. Iha membru SV nia laran mai husi katuas, joven, no mos feto ferik ho feto klosan sira. Tanba iha komunidadade distritu Liquisa iha tipu krime oin-oin ne'ebé maka iha tentativa atu akontese. Balun krime normal, balun krime seriu entau membru SV tenke mos fo informasaun ba membru sira seluk ne'ebé katuas ona no merese bele involve iha mediasaun no fo solusaun. Por ezemplu tantativa violasaun sexual hasoru feto ruma iha uma laran tanba lanu ka joga hanesan futu manu dor ka kuru-kuru, baku rahun ema nia sasan ka asaltu ema. Bain-bain tipu krime sira ne'e maka akontese ema katuas sira fo informa ba xefi suku ka lia na'in hodi halo oinsa bele kria mekanismu ruma atu hakbesik ba suspeitu ne'ebé atu halo krime. Feto ka mane foin sa'e sira mos hakbesik ba ema katuas ferik sira atu ajuda fo informa ba familia sira, oinsa maka sira bele satan netik atu la bele involve iha krime.

Iha kazu seluk hanesan arte marsial maka akontese, dala barak liu SV fo informa ba membru sira ne'ebé mai husi arte marsial. Depois fo informasaun, membru SV sira fo kedas informasaun ba lider arte marsial ne'ebé iha, depois bolu membru sira ne'ebé deskonfia atu involve iha krime. Kuandu nune'e ona maka membru SV ne'ebé katuas sira nia kna'ar fo deit konsellu, maibe la'os sira maka sai lia na'in ba solusaun.

Dala ruma mos kona-bá kazu arte marsial ne'ebé akontese iha distritu Liquisa, membru SV fo informasaun dahuluk ba iha lider arte marsial ne'ebé influensia liu. Iha SV laran iha distritu Suku Lisadila iha Maubara nian. Iha tentativa membru arte marsial sira atu halo *check point* ba kareta sira ne'ebé liu ba mai. Iha momentu ne'e maske iha membru ida

husi SV. Maibe membru seluk lakohi fo hatene informasaun kona-bá kazu deskonfiansa atu halo *check point* ne'e. Entau ba fali fo informasaun ba lider arte marsial iha Liquisa, maske nia la'os husi Maubara maibe tanba nia kuiñesidu los.

Involvimentu Feto Klosan sira iha SV signifikante tebes. Iha Suku Maumeta membru SV feto fohatene ba nia maluk feto sira atu labele la'ó kalan iha nakukun laran ba area sira hanesan mota ninin. Tanba dala barak iha ne'eba maka ema aat sira sempre halo asaltu ba feto sira. Tan ne'e sira fohatene ba sira nia maluk feto sira atu bele ses husi fatin sira ne'ebé dezigna ona katak risiko ba asaltu nian maka'as, ne'e parte ida. Iha parte seluk, membru SV feto klosan sira ne'e mos fo hatene ba Polisia. Tanba Komandu PNTL distritu Liquisa ne'e feto entau atendentu hasoru feto ba levanta keixa sempre dahuluk no atensaun maximu husi polisia. Entau iha ne'eba feto klosan sira nia motivasauan fo informasaun kona-bá tentativa violensia hasoru feto sempre lalais no regorozu.

Nune'e mos iha problema ruma akontese, feto klosan sira ne'e mos fo informasaun kona-bá violensia hasoru feto ba membru Organizassau Popular da Mulher Timor (OPMT) ne'ebé mai husi Partidu FRETILIN. Tanba OPMT ne'e kuiñesidu influensia tebe-tebes, entaun informasaun ne'e lalais pasa tutan ba autoridade lokal iha suku ka aldeia. Depois informasaun ne'e pasa tutan ba Polisia, se karik deskonfia krime grave ruma atu akontese hasoru feto. Maibe sira nia deskonfia krime kiik entau feto influensia ne'ebé hetan informasaun ne'e fo hatene deit ba autoridade lokal atu buka rezolve ho diak no lalais.

PNTL – Asaun Violensia Domestika.

Tanba Komandu PNTL Distritu Liquisa úniku feto ba lideransa iha distritu entaun la iha toleransia ba kazu violensia domestika. Komadante Liquisa Superintendente Natercia Soares Martins haktuir katak, antes nia ba asumi kargu kazu violensia domestika nia volume ass iha distritu ne'eba. Depois nia asume kargu iha 2010, nia hahu implementa ba nia membru PNTL. Iha PNTL ida ne'ebé involve violensia domestika, depois fen husi membru PNTL mai hasoru komandu Distritu, no halo kedas prosesu investigasaun imidiatu.

Kada formatura dader iha Kuartel Distritu PNTL Liquisa, Komandante Natercia nia liafuan makáas liu kona-bá direitu feen ka feto sira nia importante liu iha membru PNTL distritu Liquisa. Nia haktuir katak nu'udar feto ne'ebé asume kargu sei lahusik liu nia maluk feto sira hetan tortura husi mane.

Komandu distritu Liquisa mos kada fulan vizita ba sub-distritu Bazartete, Maubara ho Liquisa Vila atu observa situasaun real. Durante observasaun iha sub-distritu sira, sorumutu barak ho feto sira ne'ebé grupu la haensan no fo informasaun ba sira katak kazu violensia domestika ne'e sai ona krime públiku. Alen de fo informasaun, Komadante ne'e mos buka lider feto klosan ka ferik sira ne'ebé influensia atu kontinua serbisu hamutuk ho SV iha sira nia aldeia ka suku. Hasoru malu ho feto sira nia objetivu atu fo sai informasaun ba maluk feto sira kuandu hasoru violensia ruma tenke ko'alia sai.

Nune'e mos Komandante distritu Liquisa sempre involve halo diskusaun ho grupu fetu sira iha aldeia to'o nivel ho suku to'o sub-distritu sira. Husi distritu Komandu Distritu ne'e husu membru fetu ba SV ne'e barak liu. Kada suku tenke fetu ida sai membru SV. La'os sai deit membru SV, maibe mos suporta fetu hodi fo informasaun ba fetu sira atu koalia lia los no labele tauk karik sira nia laen ka sira nia maun baku sira iha sira nia uma.

Husi Nivel Nasional, Komadante Natercia nia involvmentu ba ONG sira ne'ebé atu haberan fetu. Ho Sekretaria Estadu ba Promosaun Igualidade, sempre fo apoiu ba malu hanesan fahe informasaun kona-bá lei violensia domestika nia. Tanba nia involvmentu maka'as liu atu fo suporta ba fetu hatene kle'an liu kona-bá lalaok fetu nia involvmentu ba dezenvolvmentu, maka dala ruma komadante ne'e mos fasilita fetu sira mai tuir seminar kona-bá fetu iha kapital Dili. Depois lori fetu sira mai no lori fila ba sira nia suku, komandante ne'e mos fo mos informasaun ba fetu sira ne'e atu fo tutan informasaun saida deit maka hetan durante seminar iha Dili. Komandante Natercia nia hakarak halo kapasitasaun ba fetu hatene kle'an liu kona-bá tipu violensia domestika atu nune'e sira bele kria prevensaan ba violensia domestika no bele mos halo advokasia ba fetu maluk sira ne'ebé la iha kapasidade.

Dame iha Estrada Internasional

Estrada nasional ho Internasional entre liga kapital nasaun Dili ho nasaun viziñu Indonezia liu husi area distritu Liquisa nian luan liu. Tanba atu kria paz no hakmatek ba trafiku nasional ho Internasional nian liu ho diak, PNTL distritu Liquisa ho lider komunitariu sira kria dame iha estrada internasional nia. Estudu kazu ida ne'e detekta katak, SV nia kna'ar iha dalan ninin kria duni paz no siguransa seguru tuir dalan sira iha area Liquisa to'o Loes nian.

Iha membru SV ne'ebé iha liña estrada husi suku Tibar nian to'o Loes fo informasaun ba ema maka uza dalan ba-mai. SV sira ne'e nia kna'ar maka fo informasaun ba PNTL karik iha asidente ruma ka disputa entre ema maka uza dalan ho ema maka hela iha dalan ninin. Tuir membru Polisia Komunitariu ida haktuir katak SV halo kna'ar kona-bá ida ne'e maioria sira ne'ebé hela besik estrada. Tanba fasil ba sira atu monitoriza dalan, karik akontese buat ruma sira fo informasaun lalais ba PNTL liu husi sistema *miss call*.

Iha mos knaar seluk ne'ebé ema maka hela iha dalan ninin Sira ne'ebé sai membru SV maka hanesan fo informasaun ba PNTL ho lider komunitariu kona-bá:

- a. Rai ka fatuk monu taka dalan.
- b. Ema ruma ataka kareta iha dalan sira iha area Liquisa nian.
- c. Haree mos ema sira ne'ebé haris tasi iha tasiibun Liquisa nian.⁵

Komandu Polisia Komunitariu Maubara momentu seidak iha ema mak hela iha dalan ninin sira sai membru SV, iha asidente ema mout no baku malu ka rai monu, Polisia ho ambulansia sempre atende tarde. Maibe depois iha tiha knaar SV iha dalan ninin husi

⁵ Estrada Internasional hosi area Liquisa nian besik tasiibun, no iha paisajem ne'ebé furak no sempre turista domestika husi Dili ba haris iha fatin refere. Tan ne'e maka PNTL mos tau mos SV atu fo informasaun karik ema sira ne'e mout, baku malu tamba lanu ka asidente ruma.

area suku Tibar to'o iha Loes, konsege kria paz ho hakmatek iha estrada internasional ne'ebé toma konta teritoriu distritu Liquisa sai seguru no Polisia sempre hatene lalais no halo atendementu lalais.

Kondutor *kareta* kompañia RDT toma konta *kargu* husi Kupang-Dili ba mai, durante ne'e seguru tanba Polisia distritu ho komidade iha Liquisa iha koordinasaun diak halo siguransa diak. Kondutor ne'e haktuir katak dala barak ona, nia kareta falla hela iha area Maubara ho Karimbala, PNTL ho joven sira ba hare no apoiu siguransa.

Iha mos Bus Maliana ba-mai ida nia kondutor mos haktuir katak siguransa entre area Liquisa nia la iha problema tanba PNTL ho jovern sira kopera hamutuk. Nia haktuir tan katak iha buat ruma joven ho PNTL fo hatene sira lalais, tan ne'e nia kontenti liu iha dalan ne'e kalan ka loron. Uluk liu nia labrani halai Bus kalan ka *Bus malam*. Agora nia brani tanba dalan sira ne'e la iha buat ida maka satan sira hodi sai obstaklu.

Modelu Pratika Polisiamentu Komunitaria

iha Unidade Polisia Maritima - UPM

Introdusaun

Iha estudu kazu ida ne'e fokus ba Pratika Polisia Komunitariu iha Unidade Polisia Maritima (UPM). Iha estudu kazu ida ne'e hetan intervista membru UPM na'in 18 iha UPM. Membru UPM na'in tolu husi Postu UPM Sional hamutuk na'in hat, husi postu Atauro na'in tolu, husi Portu Dili na'in tolu, husi Portu UPM Atabae na'in tolu, husi Postu UMP Com na'in tolu. Nune'e mos estudu kazu ida ne'e intervista mos komidade fa'an na'in rua, sosa na'in ema na'in rua, komidade peskador ema na'in 3. Nune'e mos pasazeru ba roo Berlin Nakroma ema na'in 3, roo na'in husi roo Atauro Jaya ema ida iha area postu UPM Sional Dili nian.

Razaun fokus estudu kazu ida ne'e ba UPM tanba merkadu tasi ninin involve ema 500 resin loran-loran no serkula orsamentu \$5,000 - \$10,000 USD iha tasi ninin no UPM identifika katak ema barak nia involvmentu iha merkadu kiik sira iha tasi ibun ho ema barak los biban ba risku maka'as atu kria konflitu boot. Seluk husi ida ne'e UPM mos uza esperiensa iha tinan 2000 iha merkadu tasi ibun Bidau Santa Ana ho Hera, sempre kria konflitu ne'ebé rezulta ema kanek no mos fa'an na'in ikan sira lakon sira nia ikan no osan, nee sorin ida, iha sorin seluk komidade sira ne'e husi rai laran no illa Atauro, nune'e mos husi illa seluk hanesan iha Wetar no Kisar nian.

Komidade sira illa hirak ne'e mai iha Dili hasoru sosa na'in sira iha tasi ibun no hetok aat liu tan involve sosa na'in sira barak tebe-tebes husi fatin oin oin iha Timor laran. Ho razaun hirak iha leten ne'e maka UPM aplika lalaok polisia komunitariu nian pratika iha polisiamentu UPM laran. Iha mos razaun seluk, iha tasi laran no iha tasi ninin involve komidade barak. Involvementu komidade husi *background* oin-oin ne'ebé risku ba konflitu bele boot, tan ne'e aplikasaun Polisiamentu Komunitariu iha UPM atu bele ajuda halo prevensaun ba konflitu no orienta solusaun ba komidade peskador sira ho komidade sosa na'in sira nia leet.

UPM la iha fasilidade naton atu uza karik iha konflitu boot ruma. Ho tan membru UPM ema na'in 36 deit ne'ebé nia area serbisu luan tebes. Tan ne'e maka atividade UPM nia pratika Polisia komunitariu hodi orienta ba solusaun preventiva hanesan meus signifikante iha UPM nia polisiamentu.

Papel UPM atu kria relasaun diak entre komidade peskador ho komidade sosa na'in sira iha area tasi ibun. Seluk tan ho ida ne'e UPM bele mos fasilita sosa na'in ho komidade peskador sira iha tasi ibun atu kria serbisu hamutuk hodi kria paz no mos limpeza iha area tasi ibun. Nune'e mos UPM nia atividade mos bele kria siguransa seguru ba komidade no turista sira ne'ebé haris iha tasi laran ho tasi ibun.

Deskrisaun Atividade UPM ba Pratika Polisiamentu Komunitariu

Aktividade UPM durante ne'e fahe ba area rua. Area ida 21ocus ba tasi ninin, area seluk 21ocus ba tasi laran. Atu fortifika UPM nia atividade ba susesu, maka serbisu hamutuk ho comunidade no mos instituisaun Governu sira nian ho ONG sira.

Parseriu ho comunidade sira iha tasi ninin fo esplikasaun ba comunidade sosa na'in ikan no ropa obralan mai husi bero oan, no comunidade ne'ebé haris iha tasi ninin ka turista ne'ebé haris tasi. Iha mos tasi ninin UPM halo koordinasaun ho comunidade no ONG sira ne'ebé halo serbisu iha area meu ambiente nian hanesan Fundasaun Haburas halo limpeza iha tasi ninin. Durante limpeza UPM mos esplika kona-bá oinsa maka halo protesaun ba dut tasi iha tasi ninin, atu labele hetan estragus. Nune'e mos UPM hatudu fatin sira iha area Kristu Rei nian ne'ebé risku makáas atu nue'e labele ba haris iha fatin sira ne'e. UPM sei serbisu hamutuk ho Dirasaun Protesaun Sivil atu tau markasaun ba iha fatin risku sira.

Iha lora 5 Jullu 2012 UPM serbisu hamutuk ho ekipa Polisia Komunitariu Distritu Dili ne'ebé suporta husi Departamentu Polisia Komunitariu Kuartel Jeral PNTL nian, organiza *life exercise* ida iha tasi ninin oinsa fo salva guarda dahuluk nian ba vitima ne'ebé mout iha tasi. Iha *life exercise* ida ne'e UPM demonstra evakuasaun ba vitima no fo assistensia moris nia ba vitima ba tempu dahuluk nian, no Polisia Komunitariu husi Distritu Dili kontaktu mediku no ambulansia hodi evakua ba ospital imidiatu. *Life exercise* ida ne'e mos hatudu oinsa kooperasaun entre UPM ho polisia komunitariu distritu Dili nian, maibe realidade UPM involve ona iha salva guarda nian iha tasi nian wainhira comunidade ida mout iha tasi Kristu Rei nia kotuk. Salva guarda ne'ebé UPM aplika lalias tanba antes ne'e UPM fahe ona número kontaktu ba comunidade sira katak iha buat ruma akontese iha tasi ninin UPM prontu fo salavasaun ba moris nian.

Atividade seluk, UPM nia kna'ar iha tasi laran tanba iha area barak los. Iha Dili ho Atauro UPM fo esplikasaun ba area sira ne'ebé roo tenki liu hodi hases ba lalora boot, seluk fali hodi ses ba dut tasi nian hanesan koral sira atu labele hetan estragus. Iha Dili UPM identifika fatin ba roo ahi ikan no roo ahi tula sasan nian. Fatin sira ne'e roo atu atraka ba no oinsa maka bele fasil hatun sasan. Seluk fali fasilita kru roo ahi kiik sira ne'e bele tun fasil iha rai maran.

Iha Portu Com halo deit esplikasaun ba povu kona-bá tempu saida maka tasi diak atu bele halo viajem ba iha tasi laran. Tanba fatin refere sempre iha asidente, tanba ne'e maka UPM tau nia postu iha area ne'eba atu identifika fatin no mos koalio ho comunidade sira atu hatene lolos tempu tasi diak no tempu tasi aat, nune'e mos kuandu iha buat ruma akontese bele kontaktu lalais UPM.

Iha Atabae, Timor oan barak maka uza roo kiik atu viajem ba Indonezia. Tan ne'e UPM esplika ba sira kona-bá risku no fo sosializasaun kona-bá hakur tasi fronteira RDTL-RI nian. Iha 2007 Timor oan na'in 4 mout UPM konsege salva sira. Tan ne'e atu labele

hakur bebeik tasi atu liu ba Indonezia no tama mai Timor-Leste UPM sosializa *border pass* ba comunidade iha fronteira.

Iha Atauro UPM fasilita roo kiik sira ne'ebé tama iha portu Atauro nian. UPM esplika ba sira kona-bá prosesu durante viagem mai tasi laran mai Dili nian. Nune'e mos prosesu sira iha Dili, atu nune'e antes to'o iha Dili roo na'in sira hatene ona regra. Komunitade fa'an na'in sira mos hatene ona presu ba ikan no mos oinsa maka labele kria problema entre sosa na'in ho komunikade fa'an na'in, UPM fasilita esplika detallu.

Beacu-Betanu

Seidauk iha postu UPM iha Beacu ho Betanu, maibe UPM iha atividade patrulla. Durante patrulla koalia ho comunidade peskador no hamutuk hamos tasiibun, esplika merkadu kona-bá tasi ninin iha Dili. Esplikasaun ida ne'e nia objetivu atu fo hatene ba comunidade kona-bá merkadu tasi ninin iha Dili, no regra sira oinsa maka asesu iha merkadu sira iha Dili. Alen de atividade ida ne'e, iha 24 Juñu 2011 comunidade Betanu ho UPM hamutuk ho Polisia eskuadra Manufahi halo limpeza ida iha area tasi ninin. Outubru 2011 UPM mos desloka ba area sira iha Beacu Viqueque. Momentu ne'eba UPM halo patrulla konjunta ho PNTL eskuadra iha Beacu hasoru comunidade peskador sira kona-bá merkadu iha tasi ninin iha Dili no oinsa maka bele asesu ba merkadu refere.

UPM nia vizita ba fatin area tasi ninin ba comunidade peskador sira sempre iha kooperasaun ho Xefe Suku sira iha fatin refere atu fasilita malu. Antes UPM kontaktu ho Komandu PNTL Distritu sire refere ne'ebé sira vizita ba hodi fasilita kontaktu xefe suku sira ka lider komunitariu. Kooperasaun ida ne'e UPM hakarak lider komunitariu sira nia involmentu ativu hodi sosializa kona-bá limpeza ba fatin turistiku sira, mekanismu ka lalaok salva guarda, limpeza jeral iha area tasi ninin, nune'e mos lalaok merkadu ikan iha tasi ninin Dili nian.

Atu fasilita informasaun sira ne'e ba comunidade UPM halo radio *talk show* ho NGO Haburas koalia kona-bá salva guarda ka siguransa jeral tasi nia iha Feveireiru 2012. Iha radio programa ida ne'e nia objetivu maka fahe informasaun kona-bá atividade UPM iha postu maritima nian iha teritoriu no fo número kontaktu kada UPM iha postu espesifiku sira iha area refere.

Atividade Dezeña Tuir Natureza Situasaun Siguransa

a. Atividade no Autor sira

Atividade sira ne'ebé aplika iha teritoriu tomak UPM dezeña tuir natureza siguransa kada area sira, maibe pontu jeral maka UPM nia objetivu maka atu comunidade peskador sira ho comunidade iha tasi ninin atu hatene pontu importante sira hanesan:

- Familiariza ho ambiente iha tasi ninin
- Prevene krime
- Mantein paz

Pontu tolu iha leten ne'e dezeña husi iniciativa UPM nian atu kria fatin hakmatek no seguru ba comunidade peskador sira, no comunidade tasi ninin, no comunidade sira ne'ebé asesu ba tasi ninin hanesan turista sira.

Kada area sira iha postu ka tasi ninin ne'ebé la hanesan ho ninia aprosimasaun ho autor tasi ninin la hanesan. Tanba ne'e maka antes UPM dezeña atividade sempre konsulta ho lider komunitariu. Iha kada esplikasaun UPM identifika uluk natureza siguransa no grupu pontensial hanesan tipu krime, grupu joventude, gurpu peskador no fatin atraku tasi ninin.

Identifikasaun ida ne'e atu fasilita UPM dezeña tipu aprosimasaun. Pur exemplu iha Atauro joventude maka número barak liu sai peskador, alen de ida ne'e fatin tasi ninin iha ne'eba mos atraku ema barak atu haris. Tanba comunidade peskador mesak joventude maka barak, maka UPM fo esplikasaun ba sira kona-bá merkadu tasi ninin iha Dili no regra asesu nian. Elen de ida ne'e mos, esplika kona-bá salva guarda imidiatu ne'ebé dala ruma mos peskador sira ne'e bele fo. Tanba ne'e maka aprosimasaun ne'ebé UPM halo fasilita comunidade peskador atu fasilita malu ba atividade peska nian iha tasi laran no iha tasi ninin iha Atauro.

b. Gastu

Tamba orsamentu UPM nia labarak atu inisia atividade barak, tanba ne'e maka UPM nia aprosimasaun ba comunidade atu involve comunidade nia partisipasaun sai meius ida hamenus gastu.

Elen de hamenus gastu partisipasaun comunidade ne'e importante atu susesu atividade sira ne'ebé UPM ho comunidade tasi ninin ho comunidade peskador sira dezeña hamutuk, no bele sente na'in atu bele pratika hamutuk.

c. Reasaun ba Iniciativa

Atividade sira hanesan limpeza iha tasi ninin, regra sira hanesan asesu ba merkadu tasi ninin iha Sional nian. Nune'e mos esplikasaun kona-bá salva vida iha Atauro hetan reasaun posetivu husi comunidade peskador ho comunidade sosa na'in no comunidade sira ne'ebé asesu ba tasi ninin hanesan turista sira.

d. Tipu ba Mudansa

Iha tinan 2000 comunidade peskador ka fa'an na'in sira mai husi Atauro fa'an halo transaksaun iha Merkadu Hera ho Bidau Sta. Ana no dalaruma sosa na'in sira hadau deit comunidade fa'an na'in nia no rezulta konfrotasaun fiziku, ne'e sorin ida.

Sorin seluk, iha 2002, 2003, no 2004, comunidade sira ne'ebé asesu ba tasi ninin mout iha tasi la iha salva guarda moris nian. Maibe depois UPM kria tiha atividade sira iha teritoriu tomak, nia impaktu signifikativu ajuda comunidade sosa na'in ho comunidade fa'an na'in fasilita comunidade sira ne'e nia atividade ho diak, paz no asesu fasil.

e. Atividade UPM Tentativa

UPM nia planu atu sosializa lei sira kona-bá meu ambiente nian ba comunidade tasi ninin. Iha mos planu seluk UPM sei halo kooperasaun hamutuk ho NGO sira ka instituisaun sira seluk atu halo salva vida ba comunidade sira. Regularmente movimentu ho biskleta iha area tasi ibun, hanesan Kristu Rei, Area Branka. Nune'e mos iha planu atu tau kuadru kompl etu ho UPM nia número kontaktu atu fasilita comunidade sira ne'ebé asesu iha tasi ninin.

Lisaun Atu Aprende

Husi aprosimasaun ho comunidade oin-oin iha tasi ninin, ho roo kiik sira iha teritoriu Timor-Leste, UPM identifika atu halo aprosimasaun ho tipu:

- a. Komunitade ho UPM serbisu hamutuk no sai parseiru diak ba pratika polisiamentu komunitariu
- b. Partisipasaun komunitade ativu ne'e hatudu fiar ba UPM fo siguransa area maritima nian.

Sumariu Rekomendasaun

FM Nia Rekomendasaun:

1. Rekomenda ba Ministériu Defeza no Siguransa presiza suporta política, lejislasaun no orsamentu ba atividade polisiamentu komunitaria ne'ebé ho inisiativa hari KPK no Siguransa Vountaria. Inklui distritu seluk ne'ebé sei hari'i ho modelu ne'ebé hanesan ka diferente tuir natureza siguransa distritu ida-idak nian.
2. Rekomenda ba Paramentu Nasional Komisaun B ne'ebé trata ba asuntu defeza, siguransa no negosiu estranjeiru kontinua halo fiskalizaun ba atividade polisiamentu nian iha nivel distrital nian hodi hare progresu serbisu ne'ebé inisia husi Komandu Distrital sira no husu ministériu relevante suporta saida maka inisia husi polisia sira.
3. Rekomenda ba Sekretaria Estadu Siguransa (SES) estabelese koordenasaun serbisu entre Komandu PNTL liu husi Departamentu Polisiamentu Komuntaria ho Dirasaun Nasional Prevensaun Konflitu Komunitaria (DNPCK) ho integradu ba prevensaun konflitu nian, maske durante ne'e iha ona Rede Nasional Prevensaun Konflitu (RNPK) maibe ida-ida la'o keta-ketak.
4. Rekomenda ba Komandu PNTL kontinua serbisu hamutuk ho organizasaun soiedade sivil no parseiru dezvoltamentu sira atu nune'e bele habelar liu tan atividade polisiamentu komunitaria iha Komandu Distrital sira iha teritoriu tomak.

Aneksu Sira

Aneksu A – Informasaun Kona-bá Metodolojia

Diskusaun

Nu'udar adopta iha metodu diskusaun Fundasaun Mahein (FM) nian ho naran *Security Sector Discussion* (SSD). Metodu ida ne'e ekipa peskizador sira halo diskusaun no análiza ba materia relevante sira ho asuntu peskiza nian. Hanesan baze ba estudu ne'e kompartilla ho kuadru legal nasional sira ne'ebé preve iha lei, regulamentu sira no estudu dahuluk ne'ebé pública tiha ona. Pratikamente diskusaun hala'o durante oras ida.

Intervista

Ekipa peskizador sira halo entrevista ho Komadante PNT sira, membru PNTL sira, lider komunitariu, comunidade sira ne'ebé involve iha projetu polisiamentu nian, kondutor sira, joven feto no mane. Entrevista hala'o iha Distritu Aileu, Bobonaro no Liquisa, inklui hala'o mos ho Unidade Polisia Maritima iha Postu Atabae, Atauro, Com, Dili no Sional no comunidade peskador sira.

Ekipa Peskizador

Ekipa peskizador ba estudu kazu ne'e lidera husi Nélon Belo nu'udar Diretor Ezekutivu. Peskizador sira kompostu husi João Almeida, Caetano Alves, no Moises Vicente. Suporta mos husi Antonio Mendonça nu'udar motorista.

Aneksu B – Perfil Partisipante iha Entrevista

Loron	Distritu no Istituisaun	Profisaun	Partisipante	Mane	Feto	Idade
	Aileu	PNTL	3	2	1	30 – 45
		Lider Komunitaria	3	2	1	25 – 40
	Bobonaro	PNTL	4	3	-	30 – 45
		Lider Komunitaria	8	7	1	30 - 45
	Liquisa	PNTL	3	2	1	30 – 45
		Lider komunitaria	2	2		30 – 40
		Joven	2	1	1	25 – 30
		ONG	1	1	-	25 – 35
		Kondutor	2	2	-	25 – 30
	UPM - PNTL	Membru UPM	18	18	-	30 - 45
		Peskador	3	3	-	25 - 35
		Fa'an ikan	2	2	-	25 - 40
		Sosa na'in ikan	2	1	1	20 - 35
		Ro na'in husi Atauro	1	1	-	30 - 40
		Pasazeiru roo	3	2	1	20 - 35

		Nakroma				
--	--	---------	--	--	--	--